

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 गुरुवार

दिनांक 19.06.2025

*****प्रमुख समाचार —

1—केंद्रीय गृहमंत्री अमित शाह ह बाईस जून के छत्तीसगढ़ अवइया हे— नवा रायपुर म नेशनल फॉरेंसिक साईंस यूनिवर्सिटी के स्थायी कैम्पस के करहीं भूमिपूजन ।

2—अंतर्राष्ट्रीय योग दिवस म प्रदेश म होही कतकोन कारीकरम — राज्यपाल ह रायपुर अउ मुख्यमंत्री ह जशपुर जिला म होवइया योग दिवस कारीकरम म होही सामिल ।

3—प्रदेस म काली एक—दू जघा म तेज हवा करे अउ गाज गिरे के संभावना हे — कतकोन जघा म हल्का ले मध्यम बरसा के संग बूदाबांदी घलो हो सकत हे ।

अब समाचार विस्तार ले

केंद्रीय गृहमंत्री-छत्तीसगढ़

केंद्रीय गृहमंत्री अमित शाह ह बाईस जून के छत्तीसगढ़ के एक दिवसीय प्रवास म रायपुर अवइया हे । ए बेरा म श्री शाह ह नवा रायपुर म नेशनल फॉरेंसिक साईंस यूनिवर्सिटी के स्थायी कैम्पस के भूमिपूजन करहीं । उप मुख्यमंत्री विजय शर्मा ह बतइन कि केंद्रीय गृह मंत्री ह अपन प्रवास के दउरान कतकोन आने कारीकरम म घलो सामिल होही ।

केंद्रीय गृहमंत्री ह छत्तीसगढ़ के आंतरिक सुरक्षा, माओवाद प्रभावित क्षेत्र के स्थिति अउ सुरक्षा बल के जवान मनके चुनौती ल लेके घलो समीक्षा करइया हे । संगेसंग ओमन ह माओवादी मोर्चा म तैनात जवान मनले गोठबात अउ शहीद जवान मनके घर वाला मनले घलो भेंट करही ।

जानबा के अनुसार ए फॉरेंसिक साईंस यूनिवर्सिटी के स्थापना करीबन चालीस एकड़ के भुईया म तीन सौ पचास करोड़ रुपिया के लागत ले करे जात हे, जउन कि अवइया बछर म देस के फॉरेंसिक क्षमता ल नवा ऊंचाई दे वाला केंद्र बन सकत हे ।

प्रधानमंत्री-योग दिवस

अंतर्राष्ट्रीय योग दिवस ल जन आंदोलन के संग एतिहासिक बनाय बर सबो ग्राम पंचायत ह पूरा तरीका ले तियार हे । पाछू महिना प्रधानमंत्री नरेंद्र मोदी ह ग्राम प्रधान मन ले अपील करे रिहीन कि ओमन ह पंचायत क्षेत्र के लोगन मन ल अंतर्राष्ट्रीय योग दिवस म सामिल होय बर प्रोत्साहित करय । श्री मोदी ह ओखर मनले योगा ल सामुदायिक जीवन के हिस्सा बनाय म अग्रणी भूमिका निभाय के आग्रह करीन हे ।

अंतर्राष्ट्रीय योग दिवस

इक्कीस जून के अंतर्राष्ट्रीय योग दिवस हरय । ए बेरा म जिला मुख्यालय म होवइया योगा के कारीकरम बर मुख्य अतिथि मनके घोसना कर दे गेहे । ए संबंध म सामान्य प्रशासन विभाग कोति ले एक ठिक सूची ल जारी करे गेहे । राज्यपाल रमेन डेका राजधानी रायपुर अउ मुख्यमंत्री विष्णुदेव साय ह जशपुर जिला के रणजीता स्टेडियम म होय वाले योग दिवस कारीकरम म मुख्य अतिथि होही । ए बेरा म श्री साय ह जिला के कतकोन विकास कार्य के लोकार्पण अउ भूमिपूजन घलो करइया हे । कारीकरम के अध्यक्षता महिला अउ बाल विकास मंत्री लक्ष्मी राजवाड़े ह करही ।

ऐति, उपमुख्यमंत्री अरूण साव ह मुंगेली अउ विजय शर्मा ह कबीरधाम जिला म होवइया योगा कारीकरम म सामिल होही। उहें, केंद्रीय राज्यमंत्री तोखन साहू ह बिलासपुर, विधानसभा अध्यक्ष डॉ. रमन सिंह ह राजनांदगांव, मंत्री रामविचार नेताम ह बलरामपुर—रामानुजगंज, दयालदास बघेल ह बेमेतरा, केदार कश्यप ह नारायणपुर, लखनलाल देवांगन ह कोरबा, श्याम बिहारी जायसवाल ह मनेन्द्रगढ़—चिरमिरी—भरतपुर, ओपी चौधरी ह रायगढ़ अउ टंकराम वर्मा ह महासमुंद म होय वाले योगा के कारीकरम म मुख्य अतिथि होही।

चरण पादुका योजना

मुख्यमंत्री विष्णुदेव साय ह इक्कीस जून के जशपुर जिला के तपकरा म होवइया कारीकरम म प्रदेशव्यापी चरण पादुका वितरण योजना के सुभारंभ करही। ए बेरा म तेंदुपत्ता संग्राहक परिवार के माईलोगिन मन ल चरण पादुका दे जाही।

मुख्यमंत्री श्री साय ह किहीन हे कि राज्य सरकार के प्राथमिकता हमेसा अंतिम पंक्ति के मनखे तक न्याय अउ सुविधा पहुंचाना हे। तेंदुपत्ता संग्राहक परिवार के राज्य के अर्थव्यवस्था अउ वनोपज आधारित आजीविका म महत्वपूर्ण योगदान हे। चरण पादुका योजना संकल्प पत्र के वादा रिहीस, जेला पूरा करे बर जाथन। ओमन किहीन कि ए सिरिफ चरण पादुका के वितरण नइ बल्कि संग्राहक परिवार के स्वाभीमान अउ सुरक्षा के प्रतीक हे।

जानबा के अनुसार ए योजना के क्रियान्वयन बर राज्य सरकार ह चालीस करोड़ रुपिया के स्वीकृति देहे जउन कि सीधा राज्य के बारह लाख चालीस हजार तेंदुपत्ता संग्राहक परिवार मनके माईलोगिन ल फायदा पहुंचाही, जेमन ल चरण पादुका के निसुल्क वितरण करे जाही।

राज्यपाल—टीबी अभियान

राज्यपाल रमेन डेका ह प्रधानमंत्री टीबी मुक्त भारत अभियान के चलत छत्तीसगढ़ ल बछर दू हजार पच्चीस—छब्बीस तक टीबी ले मुक्त राज्य बनाय बर जरूरी कोसिस करे के निरदेस देहे।

राज्यपाल ह आज राजभवन म स्वास्थ्य विभाग के आयुक्त सह—संचालक डॉक्टर प्रियंका शुक्ला ल टीबी के गंभीर मरीज मनके पूरा चिकित्सा व्यवस्था करे के निरदेस दीन। ओमन ह किहीन कि टीबी मरीज जउन के बीच म ही दवाई खाय ल बंद कर देथे, अइसने मरीज मन बर बिसेस धियान दे जाय अउ ओमन ल दवाई के कोर्स ल पूरा करे बर जागरूक करय। श्री डेका ह टीबी मरीज मन ल योगा बर जागरूक करे बर किहीन ताकि ओखर मनके रोग—प्रतिरोधक क्षमता ह बाढ़ सकय। ओमन ह टीबी मरीज मन ल पर्याप्त पोषण आहार उपलब्ध कराय के घलो निरदेस दीन। श्री डेका ह एखर बर जादा ले जादा निक्षय मित्र बनाय बर किहीन हे।

विश्व सिकल सेल जागरूकता दिवस

आज विश्व सिकल सेल जागरूकता दिवस हरय। ए मउका म प्रदेश समेत देसभर म आने—आने कारीकरम आयोजित करे जात हे। केंद्रीय स्वास्थ्य मंत्री जे.पी.नड्डा ह किहीन कि ए सिकल सेल रोग ले पीड़ित लोगन मनके आगू अवइया चुनौती के बारे म जागरूकता बढ़ाय के महत्वपूर्ण बेरा हे। एक ठिन सोसल मीडिया पोस्ट म श्री नड्डा ह किहीन कि ए दिन ह पीड़ित समुदाय मन ल शिक्षित करे, शीघ्र निदान ल बढ़ावा दे अउ चलत सोध के प्रोत्साहन बर एक ठिक मंच प्रदान करथे।

उहें, छत्तीसगढ़ के स्वास्थ्य मंत्री श्यामबिहारी जायसवाल ह किहीन हे कि सिकल सेल रोग के उपचार बर उपाय के प्रति लोगन मन ल जागरूक करे अउ ए रोग ल जड़ ले खतम करके स्वस्थ समाज ल बनाय के संकल्प लेके दिन हे।

सहायक शिक्षक—समायोजन

प्रदेस म बीएड सहायक शिक्षक मनके सहायक शिक्षक—प्रयोगशाला के पद बर समायोजन करे के निर्णय लेके बाद शिक्षक मनके काउंसलिंग सुरु हो गेहे। ए प्रक्रिया ह छब्बीस जून तक चलही। काउंसलिंग रायपुर के शासकीय शिक्षा महाविद्यालय शंकरनगर म हर रोज बिहनिया दस बजे ले करे जात हे। सत्रह जून ले सुरु होय ए काउंसलिंग म अभी तक छै सौ एक झिन शिक्षक मन ल बलाय गे रिहीस, जेमा ले पांच सौ पंचानवे झिन शिक्षक मन ह सामिल होइन जउन शिक्षक मन ह अपन काउंसलिंग बर मिले तारीख म नइ आय पाय रिहीन, ओमन ह काउंसलिंग के आने दिन म घलो आ सकत हे।

रथयात्रा—स्पेशल ट्रेन

रेलवे कोति ले भगवान श्री जगन्नाथ रथयात्रा के मउका म श्रद्धालू मनके सुविधा ल देखत हुए अवइया छब्बीस जून ले सात जुलाई तक गोंदिया—खुरदारोड— गोंदिया के बीच रथयात्रा स्पेशल ट्रेन ल चलाय जाही। ए ट्रेन ह गोंदिया ले एक बजके तीस मिनट म निकल के दूसर दिन आठ बजके पैतालीस मिनट म खुरदारोड पहुँचही। ट्रेन के स्टापेज ह डोंगरगढ, राजनांदगांव, दुरुग, रायपुर मंदिरहसौद, महासमुंद, बागबाहरा अउ खरियार रोड म घलो रइही।

मौसम

अउ अब पेस हे मौसम के हाल...

प्रदेस म काली एक—दू जघा म तेज हवा करे अउ गाज गिरे के संभावना हे। मौसम विभाग के अनुसार उत्तर—झारखंड अउ ओखर ले लगे गंगेटिक पश्चिम बंगाल के उपर एक निम्न दाब के क्षेत्र हवय। संगेसंग उपरी हवा म एक ठिन चक्रीय—चक्रवाती घेरा बने हुए हे। एखर धीर—धीरे उत्तर—पश्चिम दिसा म आगू बाढ़े के संभावना हे। एखरे असर ले प्रदेस म काली कतकोन जघा म हल्का ले मध्यम बरसा होय या फेर गरज—चमक के संग बूदाबांदी हो सकत हे। बरसा के मुख्य क्षेत्र ह उत्तर छत्तीसगढ़ होही।

संक्षिप्त समाचार

अउ अब थोरकुन समाचार सार म —

— शराब घोटाला मामला म झारखंड के एसीबी अउ ईओडब्ल्यू के टीम ह राजधानी रायपुर म लाभांडी के एक सोसायटी ले कारोबारी सिध्दार्थ सिंघानिया ल गिरफ्तार करे हे।

—छत्तीसगढ़ इन्फोटेक प्रमोशन सोसायटी अउ भारतीय विशिष्ट पहिचान प्राधिकरण कोति ले काली बीस जून के एक दिन के आधार कार्यशाला के आयोजन होही। ए कार्यशाला ह बिहनिया साढ़े नौ बजे ले मंझनिया तीन बजे तक रायपुर के न्यू सर्किट हाउस म आयोजित करे जाही।

—कबीरधाम जिला के सहसपुर—लोहारा पुलिस ह पशु तस्करी करे के आरोप म पांच झिन माईलोगिन समेत सात झिन आरोपी मन ल गिरफ्तार करे हे। जेखर करा ले सत्ताईस पशु ल बरामद करे हे।

